

Jasna Duraković
Samostalna zastupnica

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
SKUPŠTINA KANTONA SARAJEVO

n/r Vlade KS, Kriznog štaba KS, MUP-a KS, Ministarstva zdravstva KS

Sarajevo, 28.3.2020.godine

Inicijativa

Poštovani, upućujem ovu inicijativu Vladi KS, Kriznom štabu KS s naglaskom na dva resora u KS MUP i Ministarstvo zdravstva, da pod hitno upute prijedlog izmjene/olakšice propisane mjere zabrane kretanja djeci mlađoj od 18 godina, prema Kriznom štabu Federacije BiH, kako bi se djeci omogućilo pravo kretanja bar po jedan sat dnevno u vremenu prije policijskog sata dok je na snazi Odluka o proglašenju stanja prirodne i dr. nesreće, zbog opasnosti od širenja zaraze od korona virusa (COVID 19).

Obrazloženje

Naime, potpuna zabrana kretanja kao i zabrana vožnje automobilom djeci mlađoj od 18 godina jako loše utječe na psihi djece, kao i na njihovo opće fizičko i zdravstveno stanje. U dugotrajnoj izolaciji ove vrste, dolazi do mnogobrojnih štetnih posljedica po zdravlje djece, poput atrofije mišića uzrokovane nedostatkom fizičke aktivnosti kao i do prekomjerne gojaznosti. Potom dolazi do trajnog oštećenja vida, sluha i raznih psihosomatskih poremećaja usljed stalnog korištenja laptopa, tableta, igranja video igrice, gledanja televizije, korištenja mobitela i drugih tehničkih naprava. Nedostatak fizičke aktivnosti kojom se stvara ovisnost o tehničkim pomagalima dokazano utječe na nedostatak sna, razdražljivost, lošiju koncentraciju i česte glavobolje, razvoj straha, nesigurnosti i emotivne nestabilnosti kod djece, što dovodi dugoročno do ozbiljnih problema u njihovom psihi fizičkom razvoju.

Bojim se da ćemo imati mnogo dalekosežnije štetne posljedice po djecu u narednom periodu ako im se u potpunosti onemogućiti sloboda kretanja vani na čistom zraku. Iz provjerenih izvora saznajem da je Federacija BiH poprilično usamljena u propisivanju ovako rigoroznih mjera zabrane kretanja za djecu u odnosu na Republiku Srpsku, na susjedne zemlje Srbiju i Hrvatsku, ili čak u odnosu na druge zemlje u Regionu i zemlje u EU, koje nisu propisale ovako striktnu mjeru zabrane kretanja djeci mlađoj od 18 godina. Naime, pravilnom organizacijom i kontrolom ova mjera bi se morala olakšati za ovu kategoriju, na način da se omogućiti slobodno kretanje roditeljima i djeci mlađoj od 18 godina u vremenskom periodu od jednog sata dnevno, na način da se zabrani okupljanje u parkovima kako je to urađeno i u drugim zemljama, ali da se dozvoli šetnja s djecom mimo jezgre grada, dalje od velikog broja ljudi ili odlaskom na jednu od okolnih planina. Uvođenjem zabrane vožnje djece u autu ste kreirali veliki problem i za samohrane roditelje s malom djecom koji moraju raditi ili povremeno ići u nabavku a malu djecu ne mogu ostaviti samu kod kuće. Nadam se da ćete o ovome ozbiljno razmisliti i što hitnije uputiti ovaj prijedlog prema kriznom štabu FBiH, kako bi se ova olakšica u mjeri zabrane kretanja mogla početi provoditi već od druge sedmice mjeseca aprila 2020.godine.

Prof. dr. Jasna Duraković
Samostalna zastupnica

Sarajevo, 28.3.2020.